

Hebreos, mé carta cuahan nuú na Israel

Nachindahá Ndióxi Jesucristo ña ná quixi a jáyaha tuhun Ndióxi nu yó

¹ Cuahá ndivaha tañu nacahan Ndióxi sanahá xihin tásáhu jícó yó. Ta cuahá ndivaha nuú nacahan xihin ná tá najáyaha na profeta tuhun cáhan mé á nuú ñayivi. ² Joo tiempo nu ndíhí yóho nachindahá mé á Jesucristo, in túhún jini já jahyi a ña ná jáyaha tuhun Ndióxi nu yó viti. Ta nacaja Ndióxi ña nacavaha Jesucristo ndijáá ñaha ñuyívi xihín ñaha indiví. Ta najándacoo Ndióxi tóco ndihi ñaha yóho ndáha mé á. ³ Ta mé á quea náha ndá quiahva cáhnu cúu Ndióxi jáchi yehe a tá quiahva yehe Ndióxi. Ta tá quiahva cáa Ndióxi quiahva já cáa ri Jesucristo, jahyi a. Ta xihín tuhun cáhan yúhu mé á cómi a cuéntá saha tóco ndihi ñaha jáchi iin ndivaha ndée tuhun mé á. Ta nandaja víí mé a mí nuú ndihi cuachí ta já nasacoo a indiví xoo cuáha Ndióxi, tátá a.

Cáhnu chága Jesucristo a juú ga táto Ndióxi

⁴ Ta Jesucristo, mé jahyi Ndióxi naxinu a nanduu a ña cáhnu chága a juú ga táto Ndióxi. Ta nacaja Ndióxi ña ná ñehe táhvi á ña cáhnu chága quivi naní a a juú ga quivi táto mé á. ⁵ Jáchi a ñaha cachi Ndióxi xihín ni in túhún toho táto mé á tá quiahva nacachi a xihín jahyi a já: Jahyi yehe cúu yóhó, ta viti cáchi i ña nanduu u tátún, cáchi a. Ta ni coó nacachi Ndióxi xihín ni in túhún toho táto á tá quiahva nacachi a xihín jahyi a já: Yehe cacuu u tátún, ta yóhó cacuún in túhún jini já jahyi yehe, cáchi a.

⁶ Joo tá jalóho cúni chindahá Ndióxi Jesucristo, jahyi a ñuyívi yóho já ñacachi a já:

Ndítahan nu tóco ndihi táto mí i caja cáhnu na jahyi i, ñacachi a.

⁷ Já ñacachi Ndióxi já saha táto mé á:

Tá quiahva cama chá xícó tachi quiahva já cama chá cuahan táto mí i.

Ta yehe na tá quiahva yehe ñuhú cáyi ita, já ñacachi Ndióxi.

⁸ Joo tá ñacahan Ndióxi sahá jahyi a já ñacachi a já:

Yóho cúun Ndióxi ta cacomún cuénta sahá ñayivi anda ama cáa quivi,

ta cáhndún chuun xihín ña ndaa.

⁹ Ta a juú quiahva catóun ña vaha ta ñacandajún ña núu.

Sahá ña cán quea ñacaxi i yóho jáchi yehe cúu u Ndióxi ta cúu u tátún.

Ta najácutú ndaa i yóho xihín ña cájii inún já ná cajii chága inún a juú ga na xíca xuhun, ñacachi a.

¹⁰ Ta jári já ñacachi a já xihín jahyi a:

Ñacavahun tóco ndihi ñaha tá ñacava sahá saha ñuyívi ta cúun xitoho nuú ña cán.

Ta xihín ndáhun ñacavahun indiví.

¹¹ Ta vaxi quivi tá ndihi saha tóco ndihi ña yóho joo mún coo tá coún anda ama cáa quivi.

Ta tóco ndihi ña jan cayatá ña tá quiahva cayatá jáhma ndíxi na.

¹² Tá quiahva sahnú ñayivi jáhma quiahva já chichahnún ñuyívi xihín indiví.

Ta tá quiahva ndijama ñayivi jáhma ndíxi na quiahva já ndijama ña jan cajún.

Joo mún a ndijama tohún jáchi coo tá coún anda ama cáa quivi,

ta a ndijama tohún ta a ndíhi toho sahnun, ñacachi Ndióxi xihín Jesucristo.

¹³ A ñáha cachi Ndióxi xihín ni in túhún toho tátò mé á tá quiahva nacachi a xihín jahyi a já:

Naha quíi cacóun xoo cuáha i yóho,
janda quiahva ná cahnu i nu tóco ndihi na co cúní yohó ta
janda ná chinduu u na sahun jan, nacachi Ndióxi
xihín Jesucristo.

¹⁴ Jáchí tóco ndihi tátò Ndióxi cúu ná na tácu ta iin ínima
ná joo coó toho yiquí cuñu na. Cája chúun na cuéntá
Ndióxi ta mé á chindahá a na ñuyiví ña ná chindeé na
ñayivi, na nacaxi Ndióxi cacu ndaa ínima.

2

Naquixi Jesucristo jácacu a mí

¹ Sahá ña cán queá ndítahan nu yó taa johó í ña ndaa, ña
naxini johó í já ná a cáxoo í íchi cuéntá Ndióxi. ² Nacahan
tátò Ndióxi tuhun nasahan mé á nu ná ta cúu á ña ndaa
joo coó naxeen ñayivi cacu vaha na ña. Sahá ña cán queá
najándoho Ndióxi ini na tá quiahva ndítahan ndoho ini
na sahá cuachi nacaja na. ³ Joo mí, ndaja caja í cacu ndaa
ínima yo tá ta co taa johó í tuhun cahan sahá Jesús, mé a
jácacu mí. Ta ña yóho cúu á ña cáhnu ndivaha jáchi jihna
ñúhú ga mé Jesucristo, xitoho í nacaxi tuhun a ña yóho
nuú ñayivi. Ta na nataa johó nu cahan mé á, na cán sahan
na tuhun na nu yo ña cúu á ña ndaa. ⁴ Ta náha Ndióxi
ña cúu á ña ndaa jáchi cája mé á cuahá ndivaha ña náhnu
xihín ña xitúhún ndivaha. Ta nachindahá Ndióxi ínima yii
mé á nuú na cúu cuéntá Jesús ña ná caja na ña xitúhún tá
quiahva nasacu ini mé á caja na.

Nanduu Jesucristo in ñayivi

⁵ Coó nasahan toho Ndióxi ñamaní nu tátò mé á ña ná
cacomí na cuéntá sahá ñuyiví saá, ña vaxi chága chí nuu.

⁶ Jáchí já cáhí tuhun Ndióxi já:

Tátá Ndióxi, coó saha toho ñayivi ta coó ña náha cúu ná.

Joo mé ndó ñúhu ini ndó saha ná ta ndíhi ini ndó saha ná.
 7 Tá nacavaha ndó ñayivi nandaja ndó na nanduu na ña
 náhnu ndivaha.

Ta tátó mé ndó cuití va cúú ná nasayojó loho nu ná tixi
 chá tiempo.

Ta tóco ndihi ña nacavaha ndó nandiquiahva ndó ña
 ndahá ñayivi,

8 já ná cacomí na cuénta sahá, cáchí tuhun Ndióxi.

Ta mé a ndaa ni in ñaha coo nacandoo xoo jáchi nasacu
 ini Ndióxi cacomí ñayivi cuénta saha tóco ndihi ñaha joo
 cámani yii va xinu coo mé quivi cán. 9 Vatí cámani yaha ña
 yóho joo xini yo ña nandoho Jesús. Tixi chá tiempo nacaja
 Ndióxi ña ná nuu ndáha chága mé á nu tátó Ndióxi jáchi
 sahá ña quíhvi ini Ndióxi mí sahá ña cán quea nasacu ini a
 ña ná quivi Jesucristo sahá ndihi ñayivi. Ta viti nandindita
 mé á nanduu a ña cáhnu ndivaha sahá ña nandoho a tá
 naxihi a ndica crúxu.

10 Tóco ndihi ñaha ña nacavaha Ndióxi cúú á cuénta mé
 á sahá ña nacachi mé á ña ná coo a. Ta nasacu ini a ña
 ná ndoho ini Jesucristo quivi a saha yo. Ta xihín ña yóho
 najáxinu coo a nuú chuun natahnda nu á ña ná jácacu a
 mí. Jáchi ña cúní Ndióxi cúú ña ná canduu ndihí, na cúú
 cuénta mé á nu íin a. 11 Nandaja víi Jesucristo mí ta sahá
 ña yóho cúú yó jahyi Ndióxi. Ta viti Ndióxi cúú tátá ndihí
 ta cúú á tátá Jesucristo. Ña cán quea co cáchan toho
 nuú Jesucristo cahan ñani a mí ta cahan quiahva mí viti.
 12 Jáchi nacahyi ini tuhun Ndióxi ña nacahan Jesús xihin
 tátá a. Ta nacachi a já:

Ndicani i nuú ñani i saha mé ndó.

Ta nu ndítútú na cata i caja cáhnu i ndohó, cáchí Jesús.

13 Ta cáchí tucu a já:

Yehe cándéé ini i Ndióxi, tátá i.

Ta cáchí tucu a já xihin Ndióxi:

Yóho ín i xihín ndihi jahyi ndó, na nasahan mé ndó nuú i cacomí i cuéntá saha, cáchí Jesús.

¹⁴ Sahá ña ín yiquí cuñu ñayivi, na cúu jahyi Ndióxi sahá ña cán queá nanduu Jesús in ñayivi ta nasahin yiquí cuñu a tátuhun mí. Ta tá naxihi yiquí cuñu a já nacandé a nasahnu a nuú tiñáhá sacuahá, rí cája ña xíhi ñayivi. ¹⁵ Ta xihín ña yóho najáacu a tóco ndihi na nasayihví quivi jáchi ní tiempo nasanduu na ndáha tiñáhá sacuahá sahá ña yíhví na. ¹⁶ Jáchi mé a ndaa coo naquixi Jesucristo ña ná chindeé a na cúu táto Ndióxi. Ña naquixi mé á caja queá chindeé a ñayivi, na cándéé ini Ndióxi tá quiahva nacandéé ini Abraham Ndióxi. ¹⁷ Ña cán queá naxini ñúhú Jesús nduu a in ñayivi cácu ñuyíví yóho tátuhun mí. Ta xihín ña nandoho a naxinu a nanduu a in jutú sacuahá nu Ndióxi indiví. Ta naxihi a ndica cruxu sahá cuachí jáchi cája ndaa mé á tóco ndihi ñaha ta táhvi ini a saha yo. Ta xihín ña yóho nacaja cáhnu ini a sahá cuachí. ¹⁸ Ta sahá ña nandoho ini mé á ta sahá ña naxito ndojó rí quini mé á sahá ña cán queá xini a ndá quiahva ndóho iní. Ña cán queá cuu chindeé a ndaja táhan na ndóho ini, na xíto ndojó tiñáhá sacuahá.

3

Cáhnu chága Jesús a juú ga Moisés

¹ Candehé ndo, ñani i, na cúu cuéntá Jesús. Mé ndó cúu ndó na nacaxi Ndióxi cacomí a cuéntá saha. Candehé ndó Jesucristo, mé á cúu á tátuhun apóstol, ña nachindahá Ndióxi cacuu jutú sacuahá saha yo nu Ndióxi sahá ña cándéé iní mé á. ² Ta xihín ndinuhu ini a nacaja chúun a cuéntá Ndióxi, mé a nacaxi ñahá. Jáchi tá quiahva nacaja Moisés tóco ndihi ña cúní Ndióxi tañu na cúu cuéntá mé á quiahva já nacaja Jesús tóco ndihi ña cúní Ndióxi, tátá a. ³ Joo ndítahan ndicáhnu chága Jesús a juú ga Moisés

jáchí cáhnu chága Jesús a juú ga Moisés. Cúú á tátuhun tá cávaha in dataa in vehe ta ndítahan ndicáhnu chága mé dá a juú ga vehe da. ⁴ Ndúsa coo in da cávaha vehe já cuu cavaha ña joo tóco ndihi ñaha íin a jáchi nacavaha Ndióxi ña. ⁵ Ña cán queá nacaja chúun Moisés cuéntá Ndióxi xihín ndinuhu ini da tañu ñayivi mé á. Ta chuun nacaja da queá cáxi tuhun jini da xihín ná ña cúní Ndióxi cahan xihín ná chága chí nuu. ⁶ Joo jíin va chuun nacaja Jesús, mé á cúú in túhún jini já jahyi Ndióxi jáchi cómí a cuéntá sahá na cúú cuéntá mé á xihín ndinuhu ini a. Cuéntá mé á cúú mí tá ndacú coo ínima yó ta tá ná candeé iní mé á. Ta xíní ñúhú cajii iní candatí anda quixi mé á.

Cúní Ndióxi ña ná ndihvi na cúú cuéntá mé á nuú ndiquehe ndée ná

⁷ Candehe ndó ndá quiahva cáchí ínima yii Ndióxi ini tuhun mé á tá cáchí a já:

Tá ná cuni johu ndó ña cahan Ndióxi xihín ndó quivi víti, ⁸ a cája sáa ini ndó xihín á tá quiahva nacaja na Israel tá naxica nuu na yucú íchí cán.

Jáchí nandiñehe yuhu ná nu Ndióxi ta ihvi ndivaha nasacuu ini na xihín Ndióxi.

⁹ Ta já cáchí Ndióxi já:

“Mé yucú íchí jan naxito ndojó tásáhnu jícó ndó yehé, vatí naxini na ña náhnu ndivaha nacaja i tixi ivi jico cuia.

¹⁰ Sahá ña cán queá naxojo ini i xihín tóco ndihi na cán, ta nacachi i saha ná ña cúú ná na cáhvi ivi, johu ini, ta sáa ini na caca na íchi cuéntá mí i.

¹¹ Sahá ña cán queá naxojo ini i xihín ná, ta nasahan i tuhun i ña a quiahva toho i ñamani nu ná ndihvi na nuú ndiquehe ndée na xihín i”, nacachi Ndióxi xihín na Israel.

¹² Ña cán queá cuéntá vaha coo ndó, ñani i já ná a cáñehe ndó ínima quini ña jácaxoo ndó nu Ndióxi, ña tácu,

sahá ña co cúnj ndó candúsa ndó mé á. ¹³ Ña ndítahan caja ndó queá quiahva tuhun ndeé ini táhan ndó nini quivi. Ta a quiahva ndó ñamanj yaha quivi víti tá núná nu ndó caja ndó ña cúnj Ndióxi. Jáchj co cúnj a ña ná jándahvi ña núu ñuyívi yóho ndohó ta já ná ndisáá ini ndó nu Ndióxi. ¹⁴ Jáchj tá ná candeé ndusa iní mé á janda quiahva ná xinu quivi nu ndíhí cuíí tá quiahva nacaja í janda saha já queá cúnj cachi a ña in nanduú xihj Jesucristo.

¹⁵ Jáchj quiahva já cáchj tuhun Ndióxi:

Tá xinj johó ndó ña cáhan Ndióxi xihj ndo quivi víti, a cája sáá ini ndó xihj á tá quiahva nacaja na Israel tá nandiñehe yúhu ná nu Ndióxi yucú íchí cán, cáchj a.

¹⁶ Jáchj sa xinj ndó ndá na nandiñehe yúhu nu Ndióxi tá naxini johó na ña nasahnda mé á nu ná. Na cán cúu na tóco ndihi na nasandaca Moisés tá naqueta na nación Egipto. ¹⁷ Ta xihj mé na cán naxojó ini Ndióxi tixi ivi jico cuia jáchj nacaja na cuachi nu mé á ta sahá ña cán queá nacuyu na naxihj na yucú íchí cán. ¹⁸ Ta sahá ña coó naxeen na caja na ña cúnj Ndióxi sahá ña cán queá nasahan Ndióxi tuhun a ña a quiahva toho a ñamanj nu ná canduu na nuú ndiquehe ndée na xihj á. ¹⁹ Ta mé a ndaa cándaa iní ña coó nacuu ndihvi na nuú nasacu ini Ndióxi coo na sahá ña co naxeen na candúsa na mé á.

4

¹ Sahá ña cán queá viti sahan yij va Ndióxi ñamanj nu yó yaha í nuú nasacu ini mé á ndiquehe ndée yo xihj á. Joo xini ñuhú cuénta vaha coo ndó jáchj tiahva náa a xinu coo java ndó ndihvi ndó cán. ² Jáchj tá quiahva naxini johó na Israel tuhun Ndióxi quiahva já naxini johó í tuhun mé á, ña cáchj a cúnj jácacu Ndióxi ñayivi. Joo coó nacandúsa na cán ña sahá ña cán queá coó chuun a nu ná. ³ Joo mí cúu yó na candeé ini Ndióxi ta sahá ña yóho tandaa quivi xinu

coo í ndihví nuú ndiquehe ndée yó xihín á. Ta já cáchí Ndióxi já sahá ña yóho:

Naxojo ini i xihín na co cándusa yehe, sahá ña cán quéa nasahan i tuhun i

ña ná a ndihvi toho na nuú nasacu ini i ndiquehe ndée ná xihín i, cáchí a.

Nacachi Ndióxi ña yóho vatí sa nacaja tiahva mé á nuú ndihvi na ndiquehe ndée na anda tá nacava sahá saha ñuyiví. ⁴Ndáa ini tuhun Ndióxi ña nacaja mé á quiví usa. Já cáchí a já:

Quiví usa nandiquehe ndée Ndióxi nuú chuun nacaja tá nacavaha tóco ndihi ñaha, cáchí tuhun Ndióxi.

⁵Ta já cáchí tucu a já sahá na co cándusa Ndióxi:

A ndihvi toho na canduu na nuú ndiquehe ndée ná xihín i, nacachi a.

⁶Ta coo nandihvi toho na nacahan Ndióxi xihín nu cuítí cán jáchi coo naxeen na candusa na mé á. Joo núná yii va nuú java ñayivi ndihvi na ndiquehe ndée ná xihín mé á. ⁷Jáchi nasacu Ndióxi inga quiví ta cúu á quiví víti ta já cuu ndihvi ñayivi ndiquehe ndée na xihín mé á. Sanahá ndivaha nacahan Ndióxi xihín rey David sahá ña yóho ta nacahyí da ña ta já cáchí a já:

Tá xini joho ndó ña cahan Ndióxi xihín ndó quiví víti a cája saá ini ndó xihín á, cáchí tuhun Ndióxi.

⁸Ta sa xini yo ña coo najándihvi Josué ñayivi nu ndiquehe ndée na xihín Ndióxi jáchi nacahan Ndióxi sahá inga quiví vaxi chága chinuu. ⁹Sahá ña cán quéa sa xini yo ña camani xinu coo quiví ndiquehe ndée na cúu cuéntá mé á tá quiahva nandiquehe ndée mé á quiví usa. ¹⁰Jáchi ndá na ná ndihvi ndiquehe ndée nu ín mé á cán já quéa ndiquehe ndée ná nuú chuun nacaja na tá quiahva nandiquehe ndée Ndióxi nuú chuun nacaja mé á. ¹¹Sahá ña cán quéa ndítahan ndihi iní ndihví nuú ndiquehe ndée yo cán. Ta

ná a cája í tá quiahva ñacaja ña Israel cán tá coó ñaxeen na candúsa na nuú ñacahan mé á xihin ná.

¹² Íin cuaha ndée tũhun Ndióxi ta cúú á tátũhun ña tácu. Ta íin chága ndée tũhun Ndióxi a juú ga in yúchu ña ivi yúhu. Ta tá quiahva quĩhvi yúchu ña ivi yúhu tá sáhndá yiquí cuñu quiahva já quĩhvi tũhun Ndióxi janda maá ini ínima ñayivi xihin xíní túní ná ta já xínu a ini na. Ta náha ndá quiahva cáhvi ini na. ¹³ Jáchí xíní Ndióxi tóco ndihi ñaha ta a cuú chijehé yo ña cáhvi iní jáchí sándehe mé á tóco ndihi ñaha ñacavaha mé á. Ta vaxi quivi nahma yó nu mé á tóco ndihi ña ñacaja í.

Jesús cúú á jutũ sacuaħa nuú ndihí indiví

¹⁴ Mé Jesús cúú á jutũ sacuaħa nuú ndihí sahá ña cán queá co ndítahan jándacoo í ña cándéé iní Jesús, mé a cúú in túhún jini já jahyi Ndióxi. Ta ñandĩhvi a indiví nu ín Ndióxi. ¹⁵ Ta cándáhví ini Jesús mí jáchí cúú á jutũ sacuaħa nu yo ta cándaã ini a ña cúú yó ñayivi vitá ndivaha ini. Jáchí tá ñaxica nuu a ñuyíví yóho ñaxito ndojó tiñáhá sacuaħa mé á xihin tá nuú ñaha tá quiahva cája rí xihin mí joo ni in túhún cuachi coó ñacaja mé á. ¹⁶ Ña cán queá a cáyihví toho í cayatí nu ín coo Ndióxi, mé a quĩhvi ini a mí jáchí táhvi ini a saħa yo ta chindeé a mí tá ná caca i ñamani nu á.

5

¹ Tóco ndihi da cúú jutũ sacuaħa chága nu ndíhi jutũ cúú dá da sá caxi na tañu ñayivi Israel já ná caħan cuachí da sahá ñayivi nu Ndióxi. Ta jári jóco da ñaha nu Ndióxi ta sáhní da quítí nu náa sahá cuachi na. ² Ta sahá ña cúú dá da vitá ini, da ñuyíví yóho sahá ña cán queá cuu cándáhví ini da ñayivi, na co xíní ña sáhndá Ndióxi. Ta cuu cándáhví ini da na cája cuachi. ³ Ta sahá ña vitá ini da sahá ña cán queá

ndítahan cahní da quítj joco da rí nu Ndióxi sahá cuachi mé dá xihín sahá cuachi ñayivi viti.

⁴ Ta ni in da cán a cúu chinúu da mé dá cacuu da jutú sacuahá chága nu ndíhi jutú. Jáchj xíní ñúhú cacuu da da ñacana Ndióxi caja chúun cuéntá mé á tá quiahva ñacaja Ndióxi sanahá tá ñacana mé á Aarón ña ná caja chúun da cuéntá mé á. ⁵ Quiahva já ñayahá xihín Jesucristo jáchj coó ñachinúu a mé á ña ná nduu a jutú sacuahá. Ndióxi queá ñachinúu ñahá tá ñandaja cáhnu a Jesús. Ta já ñacachi Ndióxi já xihín á:

Jahyi yehe cúu yóhó,

ta viti cáchj i ña ñanduu u tátún, cáchj a.

⁶ Ta inga nu cáhan tuhun Ndióxi já cáchj a já:

Anda ama cáa quiví cacuún jutú,

ta cajún tá quiahva ñacaja in jutú, da ñasananí

Melquisedec sanahá, cáchj a.

⁷ Nani ñasahjin Jesucristo ñuyíví yóho a juú quiahva ñaxica tahví a nu Ndióxi. Ta java tañu ñasacu a ta java tañu ñacayuhú a nu Ndióxi, mé a cúu chindeé ñahá ña ná a quíví toho a. Ta sahá ña ñasacaja Jesús tóco ndihi ña sáhndá Ndióxi, tátá a sahá ña cán queá ñaxini johó Ndióxi nu cáhan mé á. ⁸ Ta vatí cúu Jesucristo in tuhún jiní já jahyi Ndióxi joo xihín ña ñandoho ini a ñuyíví yóho ñacatiahva coo johó a nu cáhan Ndióxi, tátá a xihín á.

⁹ Ta xihín ña yóho najáxinu coo mé á ñacaja tóco ndihi ña ñatahnda nu á caja. Janda jáví ñacuu jácacu a mí ña ná coo í xihín mé á anda ama cáa quiví tá ná caja í ña sáhndá mé á. ¹⁰ Ta ñandicojo a chuun ñacaja Ndióxi ña ná nduu a jutú sacuahá tátuhun mé jutú, da ñasananí Melquisedec.

Cuéntá coo ndó ná a jándacoo ndó ña cándeé ini ndó Jesús

¹¹ Íin cuahá ndivaha ñaha cúni ndicani i nu ndo sahá ña yóho joo yáncá ndivaha ndicani i ña nu ndo jáchj coo cúni

ndō taa johō ndó nū cáhan i. ¹² Anda jihna nandihvi ndó íchī cuéntá Jesús ta viti sa ndítahan nū ndó jánaha ndó tūhun Ndióxi nuú ñayivi. Joo cō cája ndó já jáchī nacavitá ndō ta tucu tucu jácuaha ndó ña cō íhvi toho. Ta viti cúú á tátūhun cō ndeé ini ndó cuxu ndó ña xíxi ñayivi náhnu joo ña cája ndó queá xíhi yīi va ndó leche tátūhun na valí va. ¹³ Ta tá quiahva xíhi na valí leche quiahva já cája ri na cō tiáhva ndícuni ndía cúú ña vaha ta ndía cúú ña núu. ¹⁴ Joo ñayivi, na cándaā vaha ini tūhun Ndióxi cúú ná tátūhun ñayivi náhnu, na tácu ini, na xíxi cuñu va jáchī sá tiahva na ndícuni na ndía cúú ña vaha ta ndía cúú ña núu.

6

¹ Sahá ña cán queá ña ndítahan caja í queá ndindacú chága yō xihín ñaha Ndióxi janda quiahva ná xinū cōo í cacúú ñayivi tácu ini xihín ñaha Ndióxi. Cō ndítahan jácuaha tucú ña najácuaha í tá jacá nandihví íchī cuéntá Jesús jáchī ndítahan catiahva í ña jan. Ndítahan cándaā iní ña cacu ndaa ínima yō sahá ña cándéé iní Jesucristo cuití va ta cō cúú á sahá ña cája í ña vaha. ² Ta sa cándaā iní ña ndítahan candúta na cúú cuéntá Jesús. Ta sa cándaā iní ndaja cája í chinúu ndáha yó jiní ñayivi tá xíca tahví yó nū Ndióxi saha ná. Ta sa cándaā iní ña vaxi quiví nditacu tucu tóco ndihi ndij ña ná caja víí Ndióxi saha ná. ³ Sahá ña cán queá cáchī i xihín ndó: Coho ndindacú chága yō xihín ñaha Ndióxi, tá ná quiahva Ndióxi ñamaní nū yō.

⁴ Ta a cuú ga ndicó cōo ñayivi nū Ndióxi tá sa najándacoo na ña nasandeé ini na mé á. Jáchī sa najándiyéhe Ndióxi ínima ná ña ná cándaā ini na saha mé á ta sa xínī na ndá quiahva ín ñaha Ndióxi. Ta janda ínima yīi Ndióxi sa nandacaan ínima ná. ⁵ Ta sa nacandaā ini na tūhun vaha cáhan sahá Jesucristo ta sa nacandaā ini na ndá quiahva náhnu caja Ndióxi chága chí nuu. ⁶ Joo tá ná jándacoo na

jan ña cándée ini na Ndióxi já quéa a cuú ga ndicó coo na nu mé á jáchi xihín ña cája na cúu á tátuhun cata caa tucu na Jesucristo, jahyi Ndióxi ndica crúxu ta já sácu ndaa na mé á nuú ñayivi. ⁷ Jáchi sa xíní ndo ndaja ín ñundáhyi nu cúun vaha javi ta ndíndahyi a. Ta tá ná cana cuahá ñaha nuú naxutu ñayivi cán já quéa cúni cachi a ña cája Ndióxi ñamaní xihín ñundáhyi cán. ⁸ Joo tá ná nana tohíñú xihín tochihmá nu ñúhu cán já quéa coo saha toho a ta ña yóho cúni cachi a ña co cája toho Ndióxi ñamaní xihín á ta vaxi quivi cayi a caja Ndióxi.

Vaxi quivi coo í xihín Ndióxi tá co jándacoo í íchi cuéntá mé á

⁹ Candehé ndó, ñani maní i, na cúu cuéntá Jesús. Vati cáhan nde ña yóho xihín ndo joo cándée ini nde ndohó ña cája tá cája ndó ña vaha ña ndítahan caja na cándée ini Jesús. ¹⁰ Ta xíní nde ña cája Ndióxi ña ndaa cuití va ta a ndíndójó toho mé á sahá ña vaha nacaja ndó tá nachindeé ndó na cúu cuéntá Jesús jáchi xihín ña yóho náha ña quíhví ini ndusa ndó mé á. Ta mé a ndaa janda viti chindeé ndó na cán. ¹¹ Ta a juú quiahva cúni nde ña ná ndíhi ini in in ndó chindeé ndo na cúu cuéntá Jesús anda quivi nu ndíhi. Ta xihín ña yóho vaxi quivi tá quiahva Ndióxi nu ndo tóco ndíhi ña ndáti ndó quiahva mé á nu ndo. ¹² Co cúni nde ña ná cajúsá ndo caca ndó íchi cuéntá Jesús. Ña cúni nde quéa ná ndíhi ini ndó caja ndó tá quiahva cája na cándée ini Ndióxi, na coo najándacoo ña cándée ini na mé á ta xihín ña yóho ñehe táhvi ná ña nasahan Ndióxi tuhun a quiahva nu ná.

¹³ Tá nasahan Ndióxi tuhun a nu Abraham sanahá já natavá a quivi mé á tátuhun testigo jáchi coo inga ga ña cáhnu chága a juú ga mé á. ¹⁴ Ta tá nasahan mé á tuhun a nu dá já nacachi a já xihín dá: “Mé a ndaa caja cuahá i ñamaní xuhun ta caja i ña ná ndicuahá ndivaha

na quixi chichún.” Já nacachi Ndióxi xihín Abraham tá nasahan tuhun a nu dá. ¹⁵ Ta coo nandihini ini Abraham nani nasandati da jáxinu coo Ndióxi tuhun a ta chí nañehe dá ña nasahan Ndióxi tuhun a quiahva nu dá. ¹⁶ Tá sahan ñayivi tuhun na nuú inga ñayivi já tává na quivi in na cáhnu chága a juú ga mé ná ña ná cacuu na testigo. Jáchi cája ndúsa in testigo xihin ná jáxinu coo na ña nasahan na tuhun na caja na. ¹⁷ Sahá ña cán quea natavá Ndióxi quivi mé á jáchi cuni a jánaha cáxi a nuú ñayivi ña a ndijama toho a tuhun nasahan nu ná ta ndúsa jáxinu coo a tuhun a nuú na ñehe táhvi ndiquehe a. ¹⁸ Ta cándaq iní ña nasahan Ndióxi tuhun a nu yó ta natavá a quivi á cacuu a testigo ta xihin ndívi ña yóho sa xini ví ña a cuú ndijama Ndióxi ta ni a cuú cahan mé á ña tuhún. Ta xihín ña yóho sahan mé á tuhun ndeé iní jáchi cándeé iní mé á ta sa nandiquiahva í mí ndáha mé á ña ná jácacu a mí. ¹⁹ Sahá ña cán quea cátivi tuun í xihin Ndióxi ta cándeé iní ña quiahva mé á nu yo ña sahan tuhun a quiahva nu yo. Ta saha ña cándeé cáhnu iní mé á saha ña cán quea co yíhvi toho í cayatí nu mé á jáchi sa nandihvi Jesús nuú yii ndivaha indiví. ²⁰ Ta cuni Jesús chindeé a mí ña ná xinu coo í nu ín a cán saha ña cán quea nandihvi jihna ñúhú ga cán a juú ga mí. Ta cuu caja Jesús ña yóho jáchi nanduu a jutú sacuahá nu Ndióxi ta anda ama cáa quivi cája mé á chuun yóho tá quiahva nacaja da naní Melquisedec sanahá ndivaha.

7

Chuun nacaja Melquisedec sanahá

¹ Mé Melquisedec yóho nasacuu da rey nuú ñayivi ñuu Salem ta nasacuu da jutú nu Ndióxi, mé á cúu ña cáhnu chága a juú ga inga ga. In tañu tá nandicó coo Abraham nasahan da nacani táhan da xihín java rey ta najándihini da saha na cán já naqueta Melquisedec íchi nuú vaxi

Abraham ta já nacaja yii dá Abraham. ² Ta mé Abraham nandaja da uxu táhndá tóco ndihi ña nacandaa da ndáha java rey tá naquee vaha da xihín na cán. Ta já nasahan da in táhndá nuú Melquisedec. Ta quiví Melquisedec yóho cúni cachi a rey, da cája ña ndaa. Ta sahá ña cómi da cuéntá sahá ñuu Salem, ña cúni cachi a nuú iin vaha ini ñayivi sahá ña cán queá cúu dá rey, da cája ña ná coo vaha ini ñayivi. ³ Ta ni in ñayivi co xíni na saha tátá nána mé Melquisedec yóho ta co ndaa nuú tutu quivi tásáhnu jícó da. Ta co xíni na ndá tañu nacacu da ta ni co xíni na ndá tañu naxihí da. Joo ña xíni na queá cúu dá jutu anda ama cáa quivi tá quiahva cúu Jesucristo jutu anda ama cáa quivi, mé a cúu in túhún jini já jahyi Ndióxi.

⁴ Ta viti cuu candehé ndó ndaja cáhnu nasacuu Melquisedec jáchi janda mé Abraham, da nasacuu tásáhnu jícó yo nasahan da nuú Melquisedec in táhndá nuú uxu táhndá ñaha ña nacandaa da ndáha rey, da naquee vaha da xihín cán. ⁵ Ta sa xíni ndo ña cáchí ley Moisés ña iin saha nuú jutu, na naquixi chichi Leví ndiquehe na in táhndá nuú uxu táhndá ña cómi na Israel. Jáchi mé jutu cán cája chúun na nu Ndióxi cuéntá táhan na na Israel vatí in cúu tóco ndihi na sahá ña naquixi ndihi na chichi Abraham. ⁶ Vatí coó naquixi Melquisedec yóho chichi Leví joo naquee tá naquee da in táhndá nuú uxu táhndá ñaha nu Abraham, da nasahan Ndióxi tuhun a nuu ña caja cuahá ñamani xihín. Tá nacaja yii Melquisedec Abraham ⁷ náha ña mé a ndaa cáhnu chága da cája yii ñayivi a juú ga na nacayii cán. Ta ni in na a cúu cachi na ña co cúu ña yóho ña ndaa. ⁸ Ta sa xíni yo ña cáhnu chága Melquisedec a juú ga jutu, na naquixi chichi Leví, na quehe in táhndá nuú uxu ñaha jáchi cúu ná ñayivi, na ndíhi saha. Joo cáhan tuhun Ndióxi sahá Melquisedec tátuhun tácú yii va da. ⁹ Ta

náha ña cáhnu chága Melquisedec a juú ga Leví, da cúu tásáhnu jícó tóco ndihi jutú, na quehe in táhnda nuú uxu a cán. Jáchi cúu á tátuhun nachahvi Leví in táhnda nuú uxu a tá nachahvi Abraham ña nu Melquisedec. ¹⁰ Jáchi tá naquehe Melquisedec in táhnda nuú uxu ñaha nu Abraham, cúu á tátuhun nasañehe Abraham tóco ndihi na vaxi chichi da ini yiquí cuñu da jáchi cámaní yí cacu na mé tiempo já.

¹¹ Ta tóco ndihi jutú, na naquixi chichi Aarón, naquixi na chichi Leví viti. Ta vatí nacaja na chuun Ndióxi ña jáyaha na ley Moisés nuú ñayivi joo a cuú nduu ndaa ñayivi nu Ndióxi xihin mé ley. Sahá ña cán quea nachindahá Ndióxi Jesucristo ñuyiví yóho já ná cacuu a inga jutú, ña ná caja tá quiahva nacaja Melquisedec sanahá. Ta coó nacaja mé á tá quiahva nacaja Aarón, da nasacuu tásáhnu jícó jutú cán. ¹² Ta tá nachindahá Ndióxi in jutú saá xíní ñúhú a ndijama ri a ley va. ¹³ Ta mé jutú saá cúu Jesucristo, xitoho í, mé a cáhan tuhun Ndióxi saha. Ta coó naquixi Jesucristo chichi Leví ta ni coó naquixi a chichi Aarón. Jín va chichi naquixi a ta ni in da taa naquixi chichi cán a ñaha cacuu da jutú. ¹⁴ Joo cándaã vaha ini ñayivi ña naquixi Jesucristo chichi Judá ta coó cúu á chichi nu sá cana jutú ta ni coó nacahan Moisés sahá na quíxi chichi Judá tá nacahan da sahá na cacuu jutú.

¹⁵ Ta cándaã vaha chága iní ña yóho jáchi sa xíní yo ña mé jutú saá ña cúu Jesucristo nandiquehe a chuun tátuhun nacaja Melquisedec sanahá. ¹⁶ Ta coó nanduu a jutú sahá ña nacacu a chichi Leví nu sá cacu jutú. Joo nanduu a jutú sahá ña cúu cája tóco ndihi ñaha ta sahá ña tácu a anda ama cáa quivi. ¹⁷ Jáchi tá cáhan Ndióxi saha Jesucristo já cáchi a já:

Yóho cúun jutú anda ama cáa quivi,

tátuhun mé jutü, da nasananí Melquisedec jáchi cájún chuun tá quiahva nacaja mé dá, cáchí tühun Ndióxi.

¹⁸ Sahá ña cán quéa nacandoo xóo ley Moisés jáchi coó chuun a ta a cúú chindeé a ñayivi. ¹⁹ Ta ni coó nacuu caja mé ley Moisés ña ná nduu ndaa ñayivi nu Ndióxi. Joo viti cájii iní jáchi xihín ña nacaja Jesucristo já cuu nduu ndaa yó nu Ndióxi ta já cuu cayatí nu mé á.

²⁰ Ta tá nacaja Ndióxi ña nanduu Jesucristo jutü já nasahan tühun a ta nasacu a mé á cúú á testigo sahá. ²¹ Joo tá nanduu na naquixi chichi Leví cán jutü coó nasahan Ndióxi tühun a saha ná tá quiahva nacaja xihín Jesucristo tá nanduu a jutü. Ta já nacachi Ndióxi ini tühun mé á:

Yehe cúú Ndióxi ta nasahan i tühun i nu yóhó ta a ndíjama toho i tühun cáhan i:

“Nachinúu i yóhó cacuún jutü anda ama cáa quivi.

Ta cajún chuun tá quiahva nacaja Melquisedec sanahá”, cáchí Ndióxi.

²² Sahá ña nandicojo Jesucristo chuun nasahan Ndióxi nu á sahá ña cán quéa cándéé iní ña jáxinu coo Ndióxi tühun nasahan nu yo. Ta vaha chága ña yóho a juú ga ley Moisés.

²³ Ta ndaja coo nasanduu cuahá jutü, na naquixi chichi Leví cán jáchi naxihi ndihi na ta nacandoo chuun na nuú inga na. ²⁴ Joo tácu Jesucristo anda ama cáa quivi ña cán quéa a jándacoo toho a chuun a nuú inga ga. ²⁵ Ña cán quéa anda ama cáa quivi iin tiahva Jesucristo jácacu a mí tá ná cayatí nu Ndióxi sahá ña nacaja Jesucristo tá naxihi a ndica crúxu. Ta iin mé á nu Ndióxi xíca tahví a nu mé á sahá na cándéé iní mé á.

²⁶ Mé a ndaa xíní ñúhú yo Jesucristo ña ná cacuu a jutü sacuahá nu Ndióxi saha yo. Jáchi mé á cúú á ña yii ndivaha ta ni in cuachi coó nacaja mé á ta ni in cuachi a cúú chícaan yó jatá. Ta co xíca nuu ga mé á tañu na cája cuachi jáchi

ín a indiví nū ndícáhnū ndiváha mé á. ²⁷ Cō xíní ñúhú caja Jesucristo tá quiahva ñacaja java ga jutū sacuaḥa, na ñaquixi chichi Leví. Jáchí nini quívi ñasahní ña cán quítí jóco ña rí nū Ndióxi sahá cuachi ñayivi. Ta nū cuítí ñacaja na ña sahá cuachi mé va na ta anda jáví ñacaja na ña sahá cuachi ñayivi. Joo jíin va ñacaja Jesucristo jáchi in túhún tañu cuití va najoco a mé á tá ñaxihí a ndica crúxu sahá cuachi tóco ndihi ñayivi. ²⁸ Tá ñacaja na ña cáchí ley Moisés já ñasacu na in dataa, da cája cuachi ña ná cacuu da jutū sacuaḥa. Joo tá ñandihí já ñachinúu Ndióxi Jesucristo, jahyí a ña ná cacuu a jutū sacuaḥa, ña cája ña ndaa anda ama cáa quívi. Ta ñasahān Ndióxi tuhun a nū yo ña jáxinu cōo a tóco ndihi ña cáchí a.

8

Jesús cúu á jutū sacuaḥa saḥa yo indiví

¹ Ñacachi nde ña yóho ña ná candaā ini ndó ña cúu Jesucristo jutū sacuaḥa saḥa yo nū Ndióxi ta ín coo a xoo cuáha Ndióxi indiví nū ndícáhnū ndiváha mé á. ² Cúu á jutū sacuaḥa cája ndíví a veñuhu indiví ña ñacavaha Ndióxi ta cō cúu á ña ñacavaha ñayivi. ³ Ndítahan nū tóco ndihi ña cúu jutū sacuaḥa cahní ña quítí nū Ndióxi ta jóco ña ñaha nū á. Ña cán queá ndítahan ri nū Jesucristo jóco a ñaha nū Ndióxi. ⁴ Tá ná caca nuu Jesucristo ñuyíví yóho, nduu já queá a cacuu toho a jutū, nduu. Jáchí sa ndúu cuahá ndiváha jutū ñuyíví yóho ta jóco ña ñaha nū Ndióxi tá quiahva sáhná ley Moisés. ⁵ Joo ña cája mé ndihi jutū ñuyíví yóho cúu á tátuhun yuhú nū ña cája Jesucristo indiví. Ta candaā iní ña cúu á tátuhun yuhú nū ña ín indiví jáchi sanahá ndiváha tá ñasahnda Ndióxi chuun nū Moisés ña ná cavaha da veñuhu xihin ní quítí já ñacachi Ndióxi já xihin da: “Cuéntá coún ndaja cavahún veñuhu xihin ní quítí jan. Jáchí xíní ñúhú coo a tá quiahva cáa

ña ñañaha i nuún jini yúcu cán”, ñacachi Ndióxi xihín Moisés. ⁶ Joo Jesucristo, mé á cúú jutú sacuaḥa saḥa yo indiví ñandicojo a in chuun ña vaḥa chága a juú ga chuun cája jutú ñuyíví. Vaḥa chága ña ñacaja Jesucristo a juú ga ley Moisés jáchi jándique táhan máni a mí xihín Ndióxi ta xihín ña yóho xínu cōo tūhun ñasahan Ndióxi nu yó jihna.

⁷ Tá ná cuu caja ley Moisés ña jácacu a mí ná a cūhun toho í indayá, nduu já quéa cō xíní ñúhú quivi Jesucristo jándique táhan máni a mí xihín Ndióxi, nduu. ⁸ Joo xíní vaḥa Ndióxi ña mé ley Moisés a cuú jácacu a ñayivi saḥá ña cán quéa já ñacachi a já:

Vaxi quivi tá quiahva i tūhun saá nuú ñayivi Israel ta nuú na ñaquixi chichi Judá.

⁹ Jíin va cúú tūhun saá quiahva i nu ná, jáchi cō cúú toho a tūhun ñasahan i nu tásahnu jícó na saḥá ndivaḥa,

tá ñatiin ndahá i na ta ñatavá i na nuú ñasanduu na nación Egipto.

Ta saḥá ña cōo najáxinu cōo na tóco ndihi ña ñasahnda i nu ná caja na saḥá ña cán quéa najándacoo i na.

¹⁰ Ta vaxi quivi tá quiahva i tūhun saá nuú ñayivi Israel.

Ta caja i ña ná candaḥa vaḥa ini na ley mí i ta cañuhu a ini ínimā ná ña ná caja na ña cúní mí i.

Ta yeḥe cacuu Ndióxi caja cáhnu na,

ta mé na cán cacuu ñayivi cacomí i cuéntá saḥa.

¹¹ Ta a cúní ñúhú ga na jáñaha ñani táhan mé ná ña ná candaḥa ini na saḥa Ndióxi,

jáchi tóco ndihi ñayivi anda na valí anda na sáhnu candaḥa ini na yo cúú yeḥe.

¹² Ta caja cáhnu ini i saḥa ndaja táhan ña núu ñacaja na, ta a ndícuhun ga ini i saḥá cuachi na, cáchí Ndióxi.

¹³ Tá naçahan Ndióxi sahá tuhun saá ña quiahva me á nuú ñayivi já quéa náha ña coó chuun ga me tuhun naçahan nu ná jihna ta cama chá ndihi sahá.

9

Veñuhu ñuyívi xihín veñuhu indiví

¹ Tá naçahan Ndióxi tuhun a nuú na Israel sanahá ndivaha já naçahnda chuun sahá ndaja caja cáhnu na me á ini veñuhu ña cáva ha na ñuyívi yóho. ² Ta ndácaan ivi cuarto ini me veñuhu cán. Ta ña ndácaan ini cuarto nu cuítí cúu in candelero xihín in mesa nu cándójó pan yii. Ta me cuarto nu cuítí yóho naní a in nuú yii. ³ Ta ín in jahmá ndeé ña ndájí nuu táhan tañu ndívi cuarto yóho. Ta cuarto ndácaan maá naní a nuú yii ndivaha. ⁴ Ta me cán ín in nu náa ña naçavaha xihín jiuhun cuáán nu chíníh má jutu jusa vaha. Ta jári cán ín sa to arca ñaha Ndióxi ta tóco ndihi jata me sa to arca na ndicuchu xihín jiuhun cuáán. Ta chí ini sa to cán ndácaan in tindo ho jiuhun cuáán nu ñúhu maná ña naxixi na Israel tá naxica nuu na yucú íchí cán. Ta jári ndácaan me yíto ñaha Aarón, dó naçaa núma sanahá. Ta chí ini arca cán ndácaan ri ivi yuu jáhnda nu ndáa ley naçahan Ndióxi nuú Moisés. ⁵ Ta jini me sa to arca cán ndíndójó ña cúu yuhú nuu táto Ndióxi naní a querubines. Cándójó a cán ña ná ndicuhun ini ñayivi ña ín Ndióxi cán caja cáhnu ini a sahá cuachi na. Ta me táto Ndióxi cán ndíca a ndixi a cándójó a jata arca. Joo a cúu ndicani chága yo sahá ña yóho viti.

⁶ Já naçahin tiahva tóco ndihi ñaha veñuhu. Ta ndijáa níi quivi na ndihvi jutu cuarto nu cuítí cán caja ndívi na ñaha caja cáhnu na Ndióxi. ⁷ Joo in tañu tá nu cuía in túhún da cúu jutu sacuahá na quihvi da cuarto maá cán. Ta ñéhe da nii quíti ña joco da nu Ndióxi sahá cuachi me dá xihín sahá cuachi ñayivi. ⁸ Ta xihín ña yóho jána ha ínima

yii Ndióxi nū yō ña a cuú ndihvi ndá ñayivi nacuu cuarto maá nuú yii ndivaha jáchi sa ín va cuarto nū cuítí. ⁹ Ta tóco ndihi ña yóho cúú á tátuhun yuhú nuu nuú ña ín tiempo viti. Ta sa xíní yō ña a cuú ndaja vií ñayivi ínima ná xihín ña jóco na nū Ndióxi tá sáhní na quítí ña quiahva na nii rí nū mé á. ¹⁰ Jáchi tóco ndihi ña nacaja na cán nasacuu a cuéntá ña sáxí na xihín ña xíhi na ta nasacuu a cuéntá ndaja nandaja vií na mé ná xihín ticuí. Joo já nanditahan cája na janda quiahva tandaa quivi ndijama Ndióxi tóco ndihi ñaha jáchi a cúu ndaja vií na ínima ná xihín ña yóho.

¹¹ Ta ndaja coo naquixi Jesucristo ñuyiví yóho ta nandu a jutú, da sacuahá chága nū yō. Naquixi a ña ná quiahva mé á ña vaha Ndióxi nū yō. Joo viti ín a indiví cája chúun a tátuhun jutú veñuhu ña vaha chága cán. Cúú á veñuhu ña coó nacavaha ñayivi ta co cúú á ñaha ñuyiví. ¹² In tañu cuití va nandihvi a nuú yii ndivaha ta coó nasañehe a níí tijúhu ni nii chélo ña jóco a nū Ndióxi. Nii mé á cúú dó naxita ndica crúxu saha yō ña ná cacu ndaa ínima yō anda ama cáa quivi. ¹³ Jihna nacaja ñayivi ña nacachi ley Moisés ta nū yiquí cuñu na naxihnu ndaa jutú níí tindiquí á níí tijúhu ta naxihnu ndaa ri da na xihín yaa chélo, rí nasahmi na nū náa. Ta xihín ña yóho nandivií yiquí cuñu na nū Ndióxi. ¹⁴ Joo ndiyahvi chága nii Jesucristo a juú ga nii quítí. Jáchi tá naxihí Jesucristo já nandivií ínima yō já ná a cája ga yō ña co ndiyahvi cán ta ná caja í tóco ndihí ña cúní Ndióxi. Nacaja ínima yii Ndióxi, mé a tácu a anda ama cáa quivi ña ná ndiquiahva Jesucristo mé á ndáha Ndióxi já naxihí a ndica crúxu saha cuachi vatí coó toho cuachi mé á.

¹⁵ Ta sahá tuhun saá nasahan Ndióxi nū yō sahá ña cán quéa cáhan Jesucristo xoo mí nū Ndióxi. Ta sahá ña nacaja Jesucristo tá naxihí a ndica crúxu cája cáhnu ini Ndióxi sahá cuachi nacaja í tá nasandico yó ley Moisés.

Ta nandacaxi Ndióxi ñayivi, na cúnj candúsa mé á já ná ndiquehe na ña vaha Ndióxi ña a ndihi toho saha jáchi já cáa tuhun nasahan Ndióxi nu ná. ¹⁶ Cúú á tátuhun tá cávaha in dataa tutu cuéntá ña ñehe táhvi ná candoo ñaha nu ná. Joo xíní ñúhú candaa ini na ña mé a ndaa naxihí da jándacoo ñaha cán anda jáví ndiyahvi mé tutu cán. ¹⁷ Jáchi nani tácu da co ndiyahvi toho tutu nacavaha da sahá ñaha ndicoo táhvi da. Janda quiahva ná quivi da já ndiyahvi a. ¹⁸ Ña cán queá tá nu cuítí nasahan Ndióxi tuhun a nuú ñayivi nacaja mé á ña ná quivi quítí ta xihín nij rí cán nandoo cuachi ñayivi. ¹⁹ Jáchi tá nandihí nacahan Moisés ley nasahan Ndióxi nuú ñayivi Israel já natiin da in yító, dó naní hisopo ta nacató da loho cachi cuáhá nu do. Ta nachindaxi da dó cán xihín nij chélo xihín níj tijúhu, dó nacava táhan xihín ticuí. Ta naxihnu ndaa da do nu libro nu ndaa ley Moisés. Ta naxihnu ndaa da dó nuú ñayivi Israel. ²⁰ Anda já nacachi da já xihín na Israel: “Xihín nij quítí yóho jáxinu coo Ndióxi tuhun a ña nasahnda nu ndó caja ndó”, nacachi Moisés. ²¹ Ta quiahva já naxihnu ndaa Moisés nij quítí nuú veñuhu níj quítí xihín nuú tóco ndihí ñaha ñúhu cán ña cája chúun na cája cáhnu na Ndióxi. ²² Jáchi cáchí ley Moisés ña xihín nij cuítí va ndivií ndaja táhan ñaha, vatí a juú ndihí a. Ta janda quiahva ná cuíta nij já cuu caja cáhnu ini Ndióxi sahá cuachi ñayivi.

Nandoo cuachí xihín nij Jesucristo

²³ Sahá ña cán queá nanditahan nu Moisés ndaja víí da ñaha veñuhu ñuyíví yóho xihín nij quítí. Ta mé ñaha cán cúú á yuhú nuú ña ín indiví. Joo ñaha ín indiví ndivií a xihín nij, dó vaha chága a juú ga nij quítí. ²⁴ Ta veñuhu ñuyíví cúú á yuhú nuú cuítí va ña ín indiví. Coó nandihvi Jesucristo nuú yij ndivaha veñuhu, ña nacavaha ñayivi. Joo nandihvi mé á indiví ta cán ín a viti ta cáhan mé á xoo mí nu Ndióxi. ²⁵ Jáchi da cúú jutú sacuha nandihvi

da tá nṽ cuía nṽú yii ndivaha veñuhu joco da nii quítí nṽ Ndióxi. Joo ña nacaja Jesucristo queá nandiquiahva a mé á quivi a saha yo ta in tañu cuití va naxita nii á ndica crúxu. ²⁶Jáchí tá ná nditahan nṽú Jesucristo quivi a cuahá tañu já queá janda mé saha tá nacava sáhá saha ñuyiví casáhá quivi a, nduu. Joo a juú a já jáchi tá jalóho cúní ndihi saha tiempo viti já nacasaá Jesucristo ñuyiví yóho ta in tañu cuití va naxihí a sahá cuachi ñayivi. ²⁷Quiahva já yáha xihín ñayivi jáchi in tálaá tañu quivi na ta anda javí ndítahan candichi na nṽ Ndióxi caja vií mé á sahá ña nacaja na tá nasanduu na ñuyiví yóho. ²⁸Ta quiahva já in tañu cuití va naxihí Jesucristo ndica crúxu jándoo a cuachi cuahá ñayivi. Ta tandaa quivi quixi tucu mé á ñuyiví yóho joo a quíví ga ña jáchi quixi a ndiquehe a na ndáti tiahva cuhun coo xihín mé á indiví.

10

¹Ta mé ley nacahyí Moisés yóho nasacuu a tátuhun in candahvi mé ña ndaa ña coo chága chínuu. Nasacuu a yuhú nṽ uun ña vaha ña vaxi nṽ yo. Jáchi mé ley yóho coó nacuu caja ndaja vií a ínima ñayivi vatí ná cayati na nṽ Ndióxi tá nṽ cuía sá sáhní na quítí joco na nṽ Ndióxi. ²Jáchí tá ná cuu ndivií ínima ná sahá ña cája na ña cáchí ley Moisés já queá in tañu cuití va joco na nii quítí nṽ Ndióxi, nduu. Ta xihín ña yóho ndoo cuachi na ta a ndícani ga ini na sahá cuachi na, nduu. ³Joo tá nṽ cuía tá sá sáhní na quítí joco na nii rí nṽ Ndióxi já queá ndicuhun ini na ña cómí na cuachi nṽ Ndióxi. ⁴Jáchí a cuú jándoo na cuachi na xihín ní tindiquí á xihín ní tijúhu.

⁵Ña cán queá tá jalóho cúní casaá Jesucristo ñuyiví yóho já nacachi a já xihín Ndióxi, tátá a:
Cṽ cúní ndó ña ná cahní ñayivi quítí joco na rí nṽ ndo ta ni cṽ cúní ndo ña ná joco na java ga ñaha nṽ ndo.

Sahá ña cán queá nasahan ndó in yiquí cuñu nuú i já ná ndiquiahva i ña nu ndo.

⁶ Co cájii ini ndó tá ná cahmi na quítí nu náa joco na rí nu ndo. Ta ni co táhán ini ndó tá ná joco na java ga ñaha nu ndo ña ná jándoo na cuachi na.

⁷ Sahá ña cán queá já nacachi i já xihín ndo:

“Tátá Ndióxi, yóho íin i ta íin tiahva vi caja i ndá ña nacuu cúni ndo.

Jáchí quiahva já ndaa ini tuhun mé ndó sahá i”, nacachi Jesucristo.

⁸ Nu cuití nacachi Jesucristo ña co cúni Ndióxi ña ná cahni ñayivi quítí quiahva na nii rí nu á. Ta ni co táhán ini a tá ná cahmi na quítí nu náa ña ná ndivií ínima ná. Ta nacachi a ña yóho vatí sáhdá ley Moisés caja ñayivi já.

⁹ Joo tá nandihí nacachi Jesucristo já xihín Ndióxi: “Yóho íin i ta íin tiahva vi caja i ndá ña nacuu cúni ndo”, nacachi a. Ña cán queá nasacu xoo Ndióxi ña nacaja na jihna ta viti ndíquehe vaha mé á ñayivi sahá ña naxihí Jesucristo ndica crúxu. ¹⁰ Nacaja Jesucristo ña nasacu ini Ndióxi caja sahá ña cán queá nacandoo víi uun tóco ndihí mí jáchí in tálaá tañu nandiquiahva Jesucristo yiquí cuñu a tá naxihí a sahá cuachí.

¹¹ Jihna ga ña nacaja ndihí jutú cúu á ña nini quivi sándita da nu náa joco da quítí nu Ndióxi. Ta vatí cuahá tañu sá cája da já joo a cuú jándoo da cuachi ñayivi xihín ña yóho. ¹² Joo in tañu cuití va naxihí Jesucristo sahá cuachi tóco ndihí ñayivi já ná cuu cacu ndaa ínima ná anda ama cáa quivi. Anda jáví nasacoo a xoo cuáha Ndióxi, tátá a indiví. ¹³ Ta cán íin coo a viti cándati a janda quiahva ná cacu Ndióxi na cándají mé á tixi sahá. ¹⁴ Jáchí in tálaá tañu naxihí Jesucristo ndica crúxu ta xihín ña yóho nandaja víi a ínima ñayivi, na nacaxi mé á. ¹⁵ Ta sa xíni yo ña cúu ña yóho ña ndaa jáchí já cáhí ínima yíi Ndióxi já:

¹⁶ Vaxi qui_vi tá quia_hva i tuhun saá nuú ñayivi Israel ta quia_hva joho coo a.

Caja i ña ná can_daa va_ha ini na ley mí i ta caja i ña cañuhu a ini ínimá ná.

¹⁷ Ta já cá_hí tucu a já:

Caja cá_hnu ini i sa_há ndaja táhan ña núu na_caja na ta a ndic_uh_un ga ini i sa_há cu_achi na, cá_hí tuhun Ndió_xi.

¹⁸ Ta sa_há ña na_caja cá_hnu ini Ndió_xi sa_há cu_achi ñayivi sa_há ña cán queá co xíní ñúhú ga ca_hni na quí_ti ña jo_co na rí nu mé á sa_há cu_achi na.

Xíní ñúhú cayatí nu Ndió_xi

¹⁹ Candehé ndo, ñani i, na cúu cuéntá Jesús. A cáy_ih_vi toho í viti ndi_hv_i nu íin Ndió_xi, mé nuú y_i ndiva_ha já_hi na_xi_hi Jesucristo sa_há cu_achí. ²⁰ Ta tá nandiquia_hva mé á yiquí cuñu a já na_xi_hi a ta xihín ña yóho na_suná a í_hi saá já ná cuu cayatí nu íin mé á. ²¹ Ta mé Jesús cúu á ju_tu sa_cua_ha sa_ha yo nu Ndió_xi já_hi có_mi a cuéntá sa_há ndihí, na cúu cuéntá mé á. ²² Ña cán queá xíní ñúhú cayatí nu íin Ndió_xi xihín ndinuhu iní já_hi cá_ndeé iní mé á. Cúu á tá_tuhun na_ndoo yiquí cuñu í tá na_xi_hi Jesucristo ndi_ca crú_xu. Ta viti co ndítahan ndicani iní sa_há cu_achi na_caja í já_hi na_jándoo mé á cu_achí. ²³ A já_ndacoo í ña cá_ndeé iní Ndió_xi ta ná candati tia_hva í ja_nda ná va_ha ña cá_hí mé á já_hi xíní va_ha í ña já_xinu coo Ndió_xi tuhun na_sahan nu yo. ²⁴ Ta ndítahan nu yo ndinducú yo ndaja caja í chin_deé táhan í já ná qui_hv_i chá_ga iní ñani táhan í. Ta ndítahan caja chá_ga yó ña va_ha. ²⁵ Co ndítahan toho caja í tá quia_hva cá_ja java na cúu cuéntá Jesús, na co cú_ni nditaca xihín ndihi java ga na cúu cuéntá Jesús. Ña ndítahan caja í queá já_cahan chá_ga táhan í ña ná taca í xihín java ga na cúu cuéntá Jesús já_hi sa xíní yo ña vaxi qui_vi quixi tucu Jesucristo ñuyíví yóho.

²⁶ Tá sa cándaꝯ vaha iní ña cꝯ ndítahan caja í cuꝯchi ta chíñee tucú mí cuꝯhan í cája í cuꝯchi vatí sa cándaꝯ iní ña ndaa, a cuú ga ndoo cuꝯchí nu Ndióxi. ²⁷ Ta cáyihví yo candatí janda quiꝯhva ndoho ndivaha iní caja Ndióxi. Jáchi jácana mé á ñayivi nu ñúhu cáyi ita, mé nu ndihi sahá na ihvi mé á. ²⁸ Jáchi ndá na Israel, na cꝯ cúni caja ña sáhná ley Moisés já queá ndítahan quivi na tá ná cacu ivi á uni testigo sahá na nu juéxe. Ta ni in na a cándaꝯhvi iní ñahá. ²⁹ Joo ndaja ga ví ndítahan ndoho ini na quehe núu Jesús, mé in túhún jini já jahyi Ndióxi. Jáchi cúu á tátuhun sáni nihni na a ta cꝯ sáhní toho na mé ná ña naxihí a jándoo a cuꝯchi na tá quiꝯhva nasahan Ndióxi tuhun a caja. Cánahá na xihín ínima yii Ndióxi, mé a cája cuꝯhá ñamaní xoho. ³⁰ Cándaa vaha iní yo cúu mé a nacachi ña yóho: “Yehe jándoho i ini ñayivi, na cája cuꝯchi. Ta caja i ña ná chahvi na sahá cuꝯchi na”, cáchi a. Ta já cáchi tucu Ndióxi, xitoho í já: “Yehe caja ví i sahá na cúu cuéntá mí i”, cáchi a. ³¹ Mé a ndaa ndáhvi nahá nacuu tá ná tiin Ndióxi mí ña ná chahví sahá cuꝯchí jáchi mé á cúu á Ndióxi, ña tácu indiví.

³² Ndítahan ndicuhun ini ndó ña nayaha tá jacá nacandeé ini ndó Jesús. Vatí nandoho ndivaha ini ndó nacaja java ñayivi joo nasahan ndeé ini ndó. ³³ Java tañu nasacu ndaa ichi na ndohó nuú ñayivi ta java tañu nacaja xixi na xihin ndo ta java tañu nacatáhan ndó xihín java ga na tá nandoho ri ini na sahá Jesús. ³⁴ Ta táhnda ini ndó sahá na cúu cuéntá Jesús ñúhu vecaa. Ta cꝯo nacahan cuꝯchí ndo ta janda cájii ini ndó vatí nacaja cuíhná na ñaha ndó jáchi cándaꝯ vaha ini ndó ña cómi ndó ña vaha chága indiví ta a ndíhi toho sahá ña cán. ³⁵ Ña cán queá a jándacoo ndó ña cándéé ini ndó Jesús jáchi tandaa quivi quiꝯhva cuꝯhá Ndióxi ña vaha nu ndo tá cándéé ini ndó mé á. ³⁶ Ndítahan nu ndó quiꝯhva ndeé ini ndó caja ndó ña cúni Ndióxi já

queá ndiquehe ndó ña vaha nasahan mé á tuhun a quiahva nu ndo. ³⁷ Jáchi já cáchi tuhun Ndióxi já: Jalóho cuni ta já quixi mé a ndítahan nuu quixi ta a cáyáncá toho a.

³⁸ Joo ndá na cúu ñayivi ndaa nu mí i catacu na sahá ña cándéé ini na yehe.

Ta tá co cuni ga na cándéé ini na yehe ta já ndicó coo na caja na cuachi já queá a cájii íní i xihín ná, já cáchi Ndióxi.

³⁹ Joo a cája toho í tá quiahva cája java ñayivi jáchi co cuni na cándéé ga ini na Jesús ta tandaa quivi cuhun na indayá. Joo mí cúu yó na cándéé íní Jesús ta tandaa quivi coo í nu íin mé á.

11

Ndítahan nu yó cándéé íní Ndióxi

¹ Tá ná cándéé íní Ndióxi já queá cuni cachi a ña sa xini vaha í ña yaha tá yaha ña ndátí yó yaha. Ta vatí co xini yó ña ndátí joo cándéé íní ña já coo. ² Jáchi sahá ña nacandéé ini tásáhnu jícó yo Ndióxi sanahá ndivaha sahá ña cán queá cájii ini Ndióxi xihín ná.

³ Ta sahá ña cándéé íní Ndióxi sahá ña cán queá cánda vaha ini ña nacahan Ndióxi ta já nacavaha mé á ñuyívi xihín indiví. Jihna coó nasahjin ni in ñaha joo viti náha nuú ña nacavaha mé á.

⁴ Ta sahá ña nacandéé ini da naní Abel Ndióxi sahá ña cán queá natahan ini Ndióxi xihín ña nacaja da tá najocó da ñaha nu á. Ta coó natahan ini a xihín ña najocó da naní Caín, da cúu ñani Abel jáchi coó nacandéé ini Caín mé á. Sahá ña cán queá nandiquehe Ndióxi ña najoco Abel nu á ta xihín ña yóho nanduu da da ndaa nu á. Ta vatí naxihí Abel joo xihín ña nacaja da sanahá jánaha da nu yo ndaja ndítahan nu yó cándéé íní Ndióxi.

⁵ Ta sahá ña ñacandeé ini da nani Enoc Ndióxi sahá ña cán queá coó naxihí toho da. Joo ñasañehe Ndióxi da indiví ta coó ñacuu ndiñehé ñayivi mé dá jáchi ñandaa da cuahān da indiví ñacaja Ndióxi. Ta cáchi tuhun Ndióxi já ñacaja mé á jáchi táhān ini a xihín ña ñacaja Enoc nani ñasahijn da ñuyíví yóho. ⁶ Tá co cāndeé iní Ndióxi já queá co táhān ini Ndióxi xohō. Jáchi ndá ña cúní cayati nu Ndióxi xíní ñúhú cāndúsa na ña ín mé á indiví ta xíní ñúhú cāndúsa na ña quiahva mé á ña vaħa nuú ñayivi tá ndinducú ña mé á.

⁷ Ta sahá ña ñacandeé ini da nani Noé Ndióxi sahá ña cán queá ñataa johō da tá ñacaxi tuhun Ndióxi xihín dá ña ndoho ini ñayivi chága chí nuu vatí coó ñasanaha nu á. Ñacandúsa Noé Ndióxi ta chí ñacasáhá da cávaħa da in barco cáhnu nuú cuu cacu ndaa mé dá xihín ña vehe da. Ta sahá ña ñacandeé ini da Ndióxi sahá ña cán queá ñanduū da ña ndaa nu mé á. Ta xihín ña ñacaja da najácojo da cuachi jatá ñayivi ñuyíví jáchi náħa cáxi a ña coó ñacandúsa na caja na ña cáchi Ndióxi.

⁸ Ta sahá ña ñacandeé ini da nani Abraham Ndióxi sahá ña cán queá ñacandúsa da ña ñacahān Ndióxi xihín dá. Ta chí ñaquee da ñuu da ta cuahān da in ñundáhyi, ña ñasahān Ndióxi tuhun a quiahva nu dá. Najāndacoo da ñuu da vatí coó ñasaxíní da ndaja nani mé ñuu nuú cūhūn da. ⁹ Ta sahá ña cāndeé ini Abraham Ndióxi sahá ña cán queá naxinu coo da ñundáhyi ña ñasahān Ndióxi tuhun a quiahva nu dá. Joo ñandiñeħe dá java ñayivi ndúu cán chí ñasahijn da tá quiahva ndúu ña tóħō. Vehe tienda ñasahijn da xihín ña vehe da. Ta quiahva já ñasahijn Isaac xihín Jacob jáchi ñasahān Ndióxi tuhun a nu mé dá xihín nuú ña vehe da. ¹⁰ Ñacaja Abraham ña yóho jáchi ndáti da coo da in ñuu ña ín indiví, ña ñacavaħa Ndióxi nuú coo a andā ama cáa quivi.

¹¹ Ta jári ñacandeé ini Sara, mé ñájíhí Abraham Ndióxi sahá ña cán queá ñacaja Ndióxi ña ñacuu quee jahyi ñá vatí sa ñacayatá ña. Ta tá ñandihi já ñacacu jahyi ñá ta ñasacuu a sahá ña ñacandeé ini ñá jáxiñu coo Ndióxi tuhun ñasahan nu ña. ¹² Sahá ña cán queá vatí ñacayatá ndivaha Abraham ta ñacayati quiví quivi da joo ñacacu jahyi da xihín ña ta ñanduú da tásáñnu jícó ña Israel. Ta cuahá ndivaha na cúu chichi da jandá a cuú candahvi na. Cúu á tátuhun quimi ña ín indiví á tátuhun ñutí yuhú tañuhú jáchi a cuú candahvi a.

¹³ Tóco ndihi ña ñaquixi chichi Abraham yóho vatí ñaxihí ña joo ñacandeé tá ñacandeé ini na Ndióxi. Ta vatí coo ñaxini na ña ñasahan mé á tuhun a quiahva nu ná joo ñasacuu a tátuhun ñaxini na ña. Jáchi ñacandeé ini na ña ñacachi Ndióxi xihín ná ta ñacajii íní ña. Ña cán queá ñacachi na ña ndúu tóo cuití ña ñuyiví yóho ta cúu ná tátuhun ña toho jáchi coo ñuu na ñuyiví yóho. ¹⁴ Cándaa íní ña ndá ña cáchí já cúni cachi a ña ndinducú ña inga ñuu nuú canduu na. ¹⁵ Ta coo ñatahnda ini na sahá ñuu ñaquee na cán jáchi cuu ndicó coo na, nduu joo coo ñacacúni na caja na ña. ¹⁶ Joo ña ndúcú ña cúu in ñuu ña vaha chága, ña ín indiví. Ta ñacaja tiahva Ndióxi mé ñuu indiví nuú cuu coo na já queá a cácahan nuu mé á cachi a ña cúu ná cuéntá mé á.

¹⁷ Ta sahá ña ñacandeé ini Abraham Ndióxi sahá ña cán queá ñasahin tiahva da cahní ña Isaac, jahyi da joco ñahá ña nu Ndióxi tá ñaxito ndojó Ndióxi ña. Já ñacaja Abraham vatí ñasahin in túhún jiní jahyi da ta sa ñasahan Ndióxi tuhun a nu Abraham ¹⁸ tá ñacachi a já xihín dá: “Cacu jahyún, ña cananí Isaac ta xihín ña cán ndicuahá ndivaha chichún chága chí nuu”, ñacachi Ndióxi. ¹⁹ Sa ñacandaa vaha ini Abraham ña cuu caja Ndióxi ña ná nditacu tucu Isaac tá sa ñaxihí ña. Ta vatí coo ñasahní toho Abraham

Isaac joo cúu á tátuhun naxihí da ta nanditacu tucu da jáchi nasahin tiahva da cahní da da sahá ña nacandee ini da Ndióxi.

²⁰ Ta sahá ña nacandee ini Isaac Ndióxi sahá ña cán queá nasahan da tuhun da nu ndívi jahyi da, da naní Jacob xihín da naní Esaú ña caja cuaha Ndióxi ñamaní xihín ndívi da chága chí nuu. ²¹ Ta sahá ña nacandee ini Jacob Ndióxi sahá ña cán queá tá jalóho cúni quivi da já queá nacachi da ña caja cuaha Ndióxi ñamaní xihín ivi jahyi ñání da, da cúu jahyi da naní José. Andá javí nacaja cáhnu da Ndióxi nani tíin ndaa da garrote da. ²² Ta sahá ña nacandee ini José Ndióxi sahá ña cán queá tá jalóho cúni quivi da nacahan da xihín na Israel sahá mé quivi tá ná quee na nación Egipto cuhun na. Ta nasahnda da chuun nu ná ña ná cañehe na lasa yiquí cuñu mé dá cuhun ña xihín ná.

²³ Ta sahá ña nacandee ini náná tátá Moisés Ndióxi sahá ña cán queá tá nandihí nacacu da já nachicaan jehé na da tañu uní yoo. Náha ña cúu dá in lee ñúchí ndivaha ta chí coó nayihví toho na tuhun nacahan rey cán tá nasahnda da chuun ña quivi ndihí tavalí jacá nacacu nuu na Israel.

²⁴ Ta sahá ña nacandee ini Moisés Ndióxi sahá ña cán queá tá nasahnu da najándacoo da vehe rey Egipto vatí najácuahnu ña cúu jahyi jhí rey cán da tátuhun jahyi ña.

²⁵ Ta ña nacaja da queá nasahan da nandoho ini da xihín na cúu cuéntá Ndióxi. Jáchi co cúni da cájii ini da cája da cuachi vatí chá tiempo. ²⁶ Ta nacahán da ña vaha chága ná ndoho ini da saha Jesucristo, mé a chindahá Ndióxi cacomí cuéntá sahá ñayivi a juú ga ña ná cacomí da cuahá ñaha cuicá nación Egipto cán. Jáchi nacahvi ini da sahá ñamaní caja Ndióxi xihín da chága chí nuu. ²⁷ Ta sahá ña nacandee ini Moisés Ndióxi sahá ña cán queá najándacoo da nación Egipto ta coó nayihví da ña ná ndicuehe rey Egipto cán xihín dá. Ta nasahan ndee ini da jáchi naxica

da tátuhun in da xíca xihin Ndióxi vatí coó naxini da mé á.

²⁸ Ta sahá ña ñacandeeé ini Moisés Ndióxi sahá ña cán queá nasahnda da chuun ña ná caja na Israel vicó pascua. Nasahnda da chuun ña ná cahní na ndicachi ta já cuihna ndaa na nijí rí yuyéhe vehe na Israel ña ná a quíví jahyi taa na, da ñacacu nu cuítí tá ná yaha tátō Ndióxi, mé a cája ña ná quivi ñayivi. ²⁹ Ta sahá ña ñacandeeé ini na Israel Ndióxi sahá ña cán queá nayaha na mahñú ndaa tañuhú naní tañuhú cuáhá. Nasacuu a tátuhun xíca na nu ñundáhyi íchí uun. Joo tá ñacasáhá na Egipto yáha na mé tañuhú cán já queá coó ñacuu caja na ña. Ñacandaa na ini ticuíf ta já naxihí ndihi na.

³⁰ Ta sahá ña ñacandeeé ini na Israel Ndióxi sahá ña cán queá ñacava nuu na ñuu Jericó tañu usa quíví ta já ñacuyu ndihi náma ñuu cán. ³¹ Ta sahá ña ñacandeeé ini ñá xíca jii naní Rahab cán Ndióxi sahá ña cán queá coó naxihí ñá xihín ndihi ñayivi ñuu Jericó, na coó ñacandúsa Ndióxi. Najácaacu Ndióxi Rahab cán jáchí sa ñandiquehe vaha ñá java taa Israel tá ñacasaa da nu cuítí sándeheé da ñuu cán.

³² Ndá chága cahan i xihin ndo. Sa ñacahan cuahá i xihin ndo joo cámani cahan i sahá da naní Gedeón xihín da naní Barac xihín da naní Sansón xihín da naní Jefté xihín da naní David xihín da naní Samuel xihín java ga na nasacuu profeta. ³³ Sahá ña ñacandeeé ini na cán Ndióxi sahá ña cán queá ñaquee vaha na tá ñacani táhan na xihín java nación ta nasacomí vaha na cuéntá sahá ñayivi ta ñandiquehe na ña vaha nasahan Ndióxi tuhun a quiahva nu ná. Java na ñachicaji na yúhu león. ³⁴ Ta java na ñandahva na ñúhu cáyi ña ná a cáyi toho na. Ta java na ñacacu na ndahá ñayivi, na ñacacúni cahní ñahá xihín machiti. Ta java na vatí vitá ini na joo ñandihvi ndée ná. Ta java na ñaquee vaha na tá ñacani táhan na xihín na

ihvi na. ³⁵ Ta java najihí ñacandeeé ini na Ndióxi ta sahá ña cán queá naxini na ña ñanditacu tucu na vehe na ñacaja Ndióxi.

Joo java na ñandoho ndivaha ini na janda quiahva naxihi na. Ta coó ñacandúsa na cacu xoo na Ndióxi jáchi ñacandaa vaha ini na ña cuhun na coo na in ñuu vaha chága nu íin mé á. ³⁶ Java na ñandoho ini na tá ñasacu ndaa ichi ñahá na ta ñacani ñahá na. Ta java na ñasandico na xihin cadena ta ñachicaan na na vecaa. ³⁷ Ta java na naxihi na jáchi ñacuun ñayivi yuu ná ta java na naxihi na tá ñasahnda túhun ñahá na. Ta java na ñaxito ndojó ñayivi na ña ná caja na cuachi. Ta java na naxihi xihin machiti. Ta java na ñasandíxi na xihin ní ndicachi xihin ní tijúhu cuití va jáchi coó toho jiuhún na. Ñacaja xíxi ñayivi xihin ná ta najándoho na ini na. ³⁸ Naxica ndáhví na nu íchí ndivaha ta naxica nuu na yucú ñúhú ta ñasanduu na tixi cáva xihin yávi nu ñúhu. Mé a ndaa cúu ná ñayivi vaha ndivaha ta co ndítahan nu ná ndoho ini na ñuyiví yóho. ³⁹ Ta cájii ini Ndióxi xihin tóco ndihi na cán jáchi ñacandeeé ini na mé á. Joo cámani ndiquehe na ña ñasahan mé á tuhun a quiahva nu ná. ⁴⁰ Jáchi cúni Ndióxi ña ná candati na cán anda tandaa quivi ndiquehe tóco ndihí ña vaha chága quiahva Ndióxi nu yo.

12

Na candeeé ini Jesús cuití va

¹ Mé ñayivi cuaha cán ñaquee vaha na jáchi ñacandeeé ini na Ndióxi. Ta jánaha na nu yo ndaja caja í ña ná quiahva ndeeé iní tá ná ndoho iní. Ña cán queá ná jándacoo í tóco ndihi cuachi cája í, ña tíin tuun mí. Ta ná jácaxoo í tóco ndihi ña sáji nuu nu yo caja í ña cúni Ndióxi. Ta ná candico yó ichi Ndióxi xihin ndinuhu iní tá quiahva ndítahan caja í. ² Ta ná candehé cáxi yo nuu Jesús jáchi

mé á cán cája ña ná casáhá cándéé iní Ndióxi ta cája ña ná cándéé iní mé á anda tandaa quivi quivi. Nandoho ini Jesús tá naxihi a ndica crúxu ta coo nacacahan nuu á vatí cácahan nuú ñayivi quivi na quiahva já. Jáchi nacandaa ini a ña tá ná ndihi ndoho ini a já tandaa quivi cajii ndivaha ini a. Ta viti íin coo a xoo cuáha Ndióxi indiví.

³ Xíni ñuhú ndicuhun ini ndó ndaja nacaja Jesús jáchi a juú quiahva nandoho ini a ndahá ñayivi cája cuachi. Sahá ña cán queá a jándacoo ndó ña cándéé ini ndó Jesús ta a cácuitá ínima ndó tá ndóho ini ndó. ⁴ Jáchi cámani yii va cahni na cája cuachi ndohó sahá ña co xeén ndó caja ndó cuachi. ⁵ Á nandindójó ndó tuhun nacahan Ndióxi xihin ndo sahá ña cúu ndó jahyi mé á. Já cáchi tuhun Ndióxi já: Jahyi maní i, a quehe núu ndó Ndióxi tá jándoho a ini ndó ña ná ndacaca vaha ndó.

Ta a cáva ivi joho ini ndó tá jánani mé á ndohó.

⁶ Jáchi já cája Ndióxi xihin na quihvi ini a.

Jándoho a ini na já ná jándacoo na ña núu ta já nduu na jahyi mé á, cáchi tuhun Ndióxi.

⁷ Quiahva ndéé ini ndó tá cája Ndióxi ña ná ndoho ini ndó. Jáchi tá quiahva cája in da tao xihin jahyi da quiahva já cája mé á xihin ndo. Jáchi tóco ndihi dataa jácaxáhan da jahyi da já ná ndacaca vaha da. ⁸ Ta tá co jándoho Ndióxi ini ndó já queá co cúu ndó jahyi mé á. Cúu ndó tátuhun jahyi ndahví na. Joo tá ná jándoho Ndióxi ini ndó já cándaa ini ndó ña mé a ndaa cúu ndó jahyi mé á. ⁹ Tá nasacuú na valí nacaja cáhnu yó tátá yo vatí najácaxáhan na mí. Joo íin chága saha caja cáhnu í Ndióxi, tátá yo, mé á íin indiví vatí jándoho a ini mí jáchi xihin ña yóho cuu coo í xihin mé á anda ama cáa quivi. ¹⁰ Tá válí yo najándacaca vaha tátá yo mí tá najánani na mí jáchi já vaha xini na vatí mé ñuyiví yóho cúu á nu ndúu too cuití ví. Joo tá jánani Ndióxi, tátá yo, mí cúu á ña vaha chága jáchi xihin ña yóho

ndaja yii á mí tá quiahva ín yii mé á. ¹¹ Mé a ndaa co táhán iní tá jánani na mí jáchi cáhíhvi yo xihín á. Joo tá nandihí já coo vaha iní jáchi nacatiahva í ndaja caca vaha í sahá ña nandoho iní ta xihín ña yóho cacuú ñayivi ndaa nu mé á.

Ndítahan nu yó táa johó í nu cáhan Ndióxi

¹² Ña cán quea ndicuíta ndó ta a jándacoo ndó mé ndó.

¹³ Ta ndinducú ndó ichí ndacú já ná cuu chindeé ndó ñayivi, na cáva ivi johó ini ña ná a ndícó coo na nuú cuachi.

¹⁴ Xíní ñúhú ndinducú ndó ndaja caja ndó coo vaha ini ndó xihín tóco ndihí ñayivi. Jándacoo ndó cuachi cája ndó ta ndinuhu ini ndó caja ndó ña cúní Ndióxi já ná cuu coo ndó nu ín mé á. ¹⁵ Cuéntá coo ndó ná a jándacoo ni in ndó íchi cuéntá Ndióxi jáchi cúní a caja cuahá ñamaní xihín ndó. Cuéntá coo ndó ná a cácuu ndó tátuhun in yucu ova ña jativí ña xixi na jáchi na cája cuachi cája quini na ta jativí na java ga na cúú cuéntá Ndióxi. ¹⁶ Coto a quíhvi nuu ndó coo ndó xihín in na coo cúú yí ndó á ñájíhí ndó. Coto a quehe núu ndó ñaha Ndióxi tá quiahva nacaja Esau. Jáchi in quivi cuíco ndivaha da ta najicó da tóco ndihí ñaha ndítahan ndiquehe da nu tátá da sahá ña ná cuxu da in cohó cuití va. ¹⁷ Joo cándaa iní ña tá nandindaa nuu dá ndiquehe da ñaha ndáha tátá da coo nacuu ndiquehe da ni in ñaha. Jáchi najicó da ña nuú ñani da sahá ña ná cuxu da in cohó. Ta vatí nasacu ndivaha da joo coo nacuu caja da ndijama da tuhun da ña sa nasahan da nuú ñani da.

¹⁸ Ta mé ndó coo nacayati ndó nu Ndióxi tá quiahva nacaja na Israel sanahá. Mé na cán nataca na saha in yucu naní Sinaí xihín da naní Moisés. Ta nacayi ñúhu cán ta nanaá ndivaha ta naxicó ndivaha tachi naxini na. ¹⁹ Ta naxini johó na nativi trompeta ta nacahan Ndióxi xihín ná. A juú quiahva nayihví na tá naxini johó na nu cáhan Ndióxi chí naxica tahví na nu á ña ná a cáhan ga xihín ná.

²⁰ Jáchí coó ñacandeé ini na taa joho na ña sáhná Ndióxi nu ná tá ñacachi a já: “Tá ná cani ndaa in ñayivi á in quítí yúcu Sinaí yóho já queá xíní ñúhú cuun ndó yuu ná á tuxú ndó na xihin poyá anda ná quivi na”, cáchí Ndióxi. ²¹ Ta a juú quiahva ñayihví na sahá ña ñaxini na cán. Ta anda Moisés viti ñayihví ndivaha da ta já ñacachi da já: “Quíji ninu i xihín ña yíhvi i”, cáchí da.

²² Joo ña ñacaja mé ndó queá sa ñacayati ndó in nuú naní Sión, mé nu íin Ndióxi, mé a tácu indiví. Mé ñuu cán cúu á tátuhun inga Jerusalén, ña íin indiví ta ndúu cuaha mil táto Ndióxi cán. ²³ Sa ñataca ndó cán caja cáhnu ndó Ndióxi xihin tóco ndihi ñayivi, na mé a ndaa cúu jahyi Ndióxi, mé na ndaa quivi nu libro Ndióxi indiví. Ta sa ñacasaá ndó nu Ndióxi, mé a cája víi saha tóco ndihi ñayivi. Ta ñataca ndó xihin tóco ndihi ñayivi, na sa ñaxihí sanahá, mé na sa ñanduu ndaa nu Ndióxi ñacaja mé á. ²⁴ Ta sa ñacayati ndó nuú Jesús, mé a cáhan xoo mí nu Ndióxi. Jáchí sahá ña ñacaja Jesús tá ñaxita nij á ndica cruxu sahá ña cán queá ñasahan Ndióxi tuhun a nu yo ña ná ndoo cuachí. Joo jíin va ñacaja Ndióxi tá ñaxita nij Abel sanahá ndivaha jáchí najándoho a ini ñani da, da naní Caín sahá ña ñasahní ñahá da.

²⁵ Cuénta coo ndó já ná a quehe núu ndó nu cáhan Ndióxi xihin yo. Jáchí ñayivi cán, na coó ñaxeen cája ña cáchí Ndióxi ñachahvi na sahá ña núu ñacaja na mé ñuyíví yóho. Ta já caja ri Ndióxi xihin mí tá ná quehe núu í tuhun mé á jáchí janda indiví íin mé á cáhan xoho. ²⁶ Mé tiempo cán najátaan Ndióxi ñuyíví yóho tá ñacahan mé á. Joo já cáchí a já viti: “Vaxi quíví ta játaan tucu i ñuyíví ta mé tiempo cán jáquiji nuu i indiví viti”, cáchí a. ²⁷ Tá ñacachi Ndióxi ña inga tucu játaan mé á ñuyíví yóho já cánda iní ña ndihi sahá ñaha ñacavaha mé á. Ta tóco ndihi ñaha, ña a cúu quiji nuu, ña cán coo a anda ama cáa quivi. ²⁸ Ñehe

táhvi yō coo í nuú cacomí Ndióxi cuéntá saha yō ta mé cán a cuú quiji nuu a. Saha ña cán quea ná ndiquiahva í ndixahvi nu Ndióxi ta ná caja cáhnu í mé á xihín ndinuhu iní jáchi cájii ini mé á xihín ña yóho. ²⁹ Jáchi mé a ndaa Ndióxi cúú á tátuhun ñúhu ña cáyi ña jándihi sahá ñaha. Ña cán quea caja mé á ña ná ndihi saha tóco ndihi cuachi.

13

Ná caja í ña táhan ini Ndióxi xihín

¹ A jándacoo ndó ña quíhvi ini ndó na cúú cuéntá Jesús jáchi cúú ná tátuhun ñani ndó á quiahva ndó. ² A ndíndójó ndo ndiquehe vaha ndó na tóho tá ná casaa na vehe ndó jáchi xihín ña yóho java na nandiquehe vaha na tátō Ndióxi vatí coo nacandaa ini na ña.

³ A ndíndójó ndo sahá ñayivi ñúhu vecaa ta xíní ñúhú tahnda ini ndó xihín ná jáchi xíní ñúhú cacuu a tátuhun ndacaan mé ndó vecaa xihín ná. Ta a ndíndójó ndo sahá ñayivi, na cája xíxi na xihín ta xíní ñúhú tahnda ini ndó xihín ná jáchi cuu ndoho ini ri ndóhó va tá quiahva ndóho ini na cán.

⁴ Vaha va cája ndó tá tándaha ndo ta xíní ñúhú caja cáhnu ndó yí ndo á ñájíhí ndo. Ta a ndúcú toho ndó coo ndó xihín inga na jáchi jándoho Ndióxi ini ndá na quíhvi nuu coo xihín na co cúú yí na á ñájíhí na.

⁵ A ndiáva ini ndó cacomí ndó cuahá jjuhún. Ndítahan cajii ini ndó xihín ña cómi ndo jáchi já cáhí Ndióxi já: “A jándacoo toho i ndohó ta ni a ndíndójó i saha ndo”, cáhí a. ⁶ Saha ña cán quea cuu candeé iní Ndióxi ta cuu cachí já:

Mé á cúú Ndióxi, xitoho i ta chindeé a yehe.

Ta a cáyihví toho i ndá ñaha ndúcú ñayivi caja na xihín i.

⁷ A ndíndójó ndo sahá na nasacomí cuéntá saha ndo ta ni sahá na naxaxi tuhun tuhun Ndióxi nu ndo. Candehé

ndó ndaja ñacaja na ñuyíví yóho jáchi ñacandéé ini na Ndióxi anda quiahva ñaxihí ña. Ta ndítahan nu mé ndó candéé ini ndó a tá quiahva ñacaja ña cán.

⁸ Co ndíjama toho Jesucristo. Tá quiahva nasacuu a sanahá ndivaha quiahva já cúú ri a anda viti ta quiahva já coo a anda ama cáa quívi. ⁹ A quiahva toho ndó ñamani nuú ñayivi ña ná jándahvi na ndohó xihín ña jáñaha ña nu ndo. Jáchi cúú á sahá ñamani cája Ndióxi xoho ña ndíndacú ínima yo. Ta co cúú á sahá ña jáñaha java ñayivi tá cáchí ña ña a cúú cuxú java ñaha ña ná nduu ndaa ínima yo. Mé a ndaa ña yóho co chindeé a mí.

¹⁰ Tá ñaxihí Jesucristo ndica crúxu já najoco a mé á nu Ndióxi saha yo. Joo jín va ñacaja jutú cuéntá ña Israel sanahá tá najoco ña quítí nu Ndióxi. ¹¹ Jáchi da cúú jutú sacuañaha ñasañehe da nii rí ñaxihí cán ini veñuhu nuú yii ndivaha ta já najoco da dó nu Ndióxi sahá cuachi ñayivi. Joo ñatavá da yiquí cuñu rí jatá ñuu nu sáhmi na ri. ¹² Ta quiahva já ñaxihí Jesús jatá ñuu Jerusalén. Ta ñaxita nii a ña ná jándo a cuachi ñayivi. ¹³ Ña cán queá cóho nuú Jesús. Cúú á tátuhun cūhun í jatá ñuu ta a cácahan nuú yó ndoho iní xihín mé á. ¹⁴ Jáchi ñuyíví yóho coo toho ni in nuú cuu coo í anda ama cáa quívi. Joo ndínducú yo inga ñuu nuú cuu coo í chága chí nuu. ¹⁵ Cóho caja cáhnu í Ndióxi ní tiempo ta chindeé Jesús mí caja í ña. Ta ña yóho cúú á tátuhun ña jóco yo nu mé á sahá ña ñacaja tá ñaxihí a ndica crúxu. Cóho caja cáhnu í mé á xihín yúhu yo jáchi cúú yó cuéntá mé á. ¹⁶ A ndíndójó ndo caja vaha ndó ta ná chindeé ndo ñani táhan ndó xihín ña cómi ndo. Jáchi ña yóho cúú á tátuhun ñaha jóco ndo nu Ndióxi ta cájii ini mé á xihín á.

¹⁷ Candúsa ndó ña cómi cuéntá saha ndo ta caja ndó ña cúni ña. Jáchi ñasahan Ndióxi chuun yóho nu ná. Ta tandaa quívi nditahan ndicani na nu Ndióxi sahá ña

naçaja na. Caja ndó ña cúnì nà já ná cajji ini na ta ná a cóo cuéha ini na jáchi a cuú quee vaha ndó já.

¹⁸ Caça tahví ndo nu Ndióxi sahá nde jáchi nandivií ínima nde ta cúnì nde caja vaha nde níí tiempo. ¹⁹ Caja ndó ñamanì caça tahví ndo sahá i ña ná quiahva Ndióxi ñamanì nuú i saa yachi i nu ndó coto nihni i ndohó.

Xihín tuhun yóho ndihi carta yóho

²⁰ Ña cúnì quea ná quiahva Ndióxi ña ná coo vaha iní. Mé a cán najánditacu tucu a Jesucristo, mé a cuú xitoho í. Ta sahá ña naçaja Jesucristo tá naxita nij a ndica crúxu sahá ña cán quea nasahan Ndióxi tuhun a nu yo ta a ndihi toho sahá. Ta mé Jesús cómí a cuénta saha yo tá quiahva in pastó cómí da cuénta sahá ndicachi jana dá. ²¹ Ta ná caja Ndióxi ña ná ndindacú ínima ndó já ná cuu caja ndó tóco ndihi ña cúnì a. Ta sahá ña naçaja Jesucristo ná caja Ndióxi xihín yo ndá ña naçuu ña táhán ini mé á xihín. Ná caja cáhnu í Jesucristo anda ama cáa quivi. Já ná coo.

²² Xíca tahví i nu ndo ña ná coo cáhnu ini ndó xihín tuhun cáhan i xihín ndo, ñani i, nà cuú cuénta Jesús. Jáchi carta loho cuití va naçahyí i nu ndo já ná ndindacú ínima ndo. ²³ Ta cáxi tuhun i xihín ndo sahá Timoteo, mé da nasandacaan veca joo sa najani dá viti. Tá ná casa yachi da yóho já saa da xihín i coto nihni nde ndohó.

²⁴ Cañan Ndióxi ndó xihín tóco ndihi nà janañaha tuhun Ndióxi nuú ñayivi ta cañan Ndióxi ndó xihín tóco ndihi nà cuú cuénta Jesús. Tóco ndihi nà cuú cuénta Jesús, nà ndúu nación Italia yóho chindahá nà Ndióxi coo ndó.

²⁵ Ná caja cuaha Ndióxi ñamanì xihín tóco ndihi ndó. Já ná coo.

Tuhun saá ña najándacoo Jesucristo nu yo: El Nuevo
Testamento en el mixteco de Silacayoapan
New Testament in Mixtec, Silacayoapan (MX:mks:Mixtec,
Silacayoapan)

copyright © 2009 Wycliffe Bible Translators, Inc.

Language: Mixtec, Silacayoapan

Translation by: Wycliffe Bible Translators, Inc.

Mixtec, Silacayoapan

mks

Mexico

Copyright Information

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mixtec, Silacayoapan

© 2009, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 27 Sep 2019 from source files dated 27 Sep 2019

7f2d3ecf-6d15-55a5-9081-6e970474df2f